

Grad Novi Pazar
Skupština grada
Odbornička grupa SDA Sandžaka
Novi Pazar
09. februar 2022. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU INICIJATIVE ZA FORMIRANJE ŠUMSKOG GAZDINSTVA „SANDŽAK“**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 10. februara 2022. godine.

Predsjednik odborničke grupe
Ahmedin Škrijelj

PRIJEDLOG

Na osnovu člana 79. stav 1. tačka 2) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 15. stav 1. tačka 38), člana 147. Statuta grada Novog Pazara („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 15. novembra 2022. godine, donosi

O D L U K U

o pokretanju inicijative za formiranje Šumskog gazdinstva „Sandžak“

Član 1.

Skupština grada Novog Pazara traži od Vlade Republike Srbije, Ministarstva poljoprivrede, šumarstva i vodoprivrede i Javnog preduzeća “Srbijašume” da se za teritoriju Grada Novog Pazara i Opština Tutin i Sjenica formira Šumsko gazdinstvo “Sandžak” sa sjedištem u Novom Pazaru.

Član 2.

Šumsko gazdinstvo “Sandžak” činile bi tri Šumske uprave i to: ŠU Novi Pazar, ŠU Tutin i ŠU Sjenica, uključujući i zaštićena područja, spomenike prirode, specijalne rezervate, lovišta i rasadnike koji se nalaze na teritoriji Grada Novog Pazara i opština Tutin i Sjenica.

Šumskom gazdinstvu “Sandžak” povjerilo bi se i djelimično upravljanje Parkom prirode “Golija”.

Član 3.

Skupština grada Novog Pazara zahtjeva da Vlada Republike Srbije, Ministarstvo poljoprivrede, šumarstva i vodoprivrede i Javno preduzeće “Srbijašume” prihvate ovu Inicijativu te postupe u skladu sa njom najkasnije do kraja kalendarske 2021. godine.

Član 4.

Ovu odluku dostaviti Vladi Republike Srbije, Ministarstvu poljoprivrede, šumarstva i vodoprivrede i Javnom preduzeću “Srbijašume”.

Član 5.

Ovu odluku objaviti u “Službenom listu grada Novog Pazara”.

SKUPŠTINA GRADA NOVOG PAZARA

Broj:

U Novom Pazaru, _____. _____. 2022. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Pravni osnov za donošenje ove odluke sadržan je u:

- članu 79. stav 1. tačka 2) Zakona o lokalnoj samoupravi ;
- članu 15. stav 1. tačka 38) i članu 147. Statuta grada Novog Pazara
- članu 137. Poslovnika Skupštine grada Novog Pazara

Razlozi za donošenje odluke:

Prema postojećem teritorijalnom ustrojstvu Šumskih gazdinstava u Republici Srbiji područje Sandžaka je podijeljeno na tri Šumska gazdinstva i to: ŠG "Prijepolje" Prijepolje (Prijepolje, Priboj i Nova Varoš), ŠG "Šumarstvo" Raška (Novi Pazar i Tutin) i ŠG "Golija" Ivanjica" (Sjenica).

Sandžačke opštine Prijepolje, Priboj i Nova Varoš dio su jednog Šumskog gazdinstva sa sjedištem u Prijepolju. Dok su Novi Pazar, Sjenica i Tutin, neprirodno podijeljeni između dva Šumska gazdinstva sa sjedištem u Ivanjici i Raški.

Postojeća organizacija Šumskih gazdinstava proizvod je političkog nastojanja da se ovaj čitav region u institucionalnom i svakom drugom smislu unazadi a da našim prirodnim resursima upravljaju drugi.

Tome u prilog govori i činjenica da je do 1956. godine Novi Pazar bio najbogatija opština po šumskom bogastvu, sve dok nije došla odluka da se 10.000 ha visoke šume smrče preda opštini Ivanjica. Po ekonomskoj vrijednosti Novom Pazaru je tada uzeto 80% vrijednosti šuma. Posle ove predaje šuma u Ivanjici je formiran veliki kombinat ŠPIK Ivanjica.

Na teritoriji grada Novog Pazara (12.788,89) i opština Tutin (27.054,88) i Sjenica (19.218,84) ima 59.062,61 ha šume.

Glavna šumska bogatsva u postojećim Gazdinstvima "Šumarstvo" Raška i "Golija" Ivanjica se nalaze na teritoriji sandžačkih opština uključujući i zaštićena područja, spomenike prirode, specijalne rezervate, lovišta i rasadnike.

Ako se uzmu u obzir navedeni podaci i činjenice kao i interes šire društvene zajednice i to ne samo u Novom Pazaru, neophodno je da Skupština grada, ovom odlukom, utvrdi lokalni i regionalni interes te da od republičkih organa i institucija traži da se postupi u skladu sa ovom inicijativom.

Usvajanjem ove Odluke, odnosno pokretanjem ove inicijative pored toga što se uspostavlja još jedna regionalna institucija od izuzetnog značaja Skupština grada, do uspostavljanja Autonomije Sandžaka, iznalazi mehanizam putem kojeg se može uticati na:

- gajenje, održavanje i obnovu šuma i rekonstrukcija degradiranih šuma;
- gazdovanje šumama i lovištima posebne namene;
- stručno savetodavni poslovi u privatnim šumama;
- upravljanje zaštićenim područjima;
- upravljanje ribarskim područjima;
- projektovanje i izgradnju šumskih saobraćajnica;
- lovni, ribolovni, seoski i ekoturizam itd.

Donošenjem ove Odluke na konkretan način štite se interesi građana Novog Pazara, ali i građana susjednih i nama bliskih opština Tutina i Sjenice. Novi Pazar kao sveukupni centar Sandžaka ima obavezu da bude nosioc i pokretač progresivnih procesa i da građanima postepeno vrati oduzeto pravo da u skladu sa svojim interesima upravljaju šumama, vodama i drugim prirodnim resursima.

Objašnjenje pojedinačnih rješenja propisanih odlukom:

Član 1: Utvrđen je predmet odluke, odnosno pokrenuta je Inicijativa za formiranje Šumskog gazdinstva "Sandžak" sa sjedištem u Novom Pazaru.

Član 2: Utvrđene su organizacione jedinice koje bi sačinjavale ŠG "Sandžak".

Član 3: Utvrđen je rok za postupanje po ovoj Inicijativi.

Član 4: Propisana je obaveza dostavljanja odluke, Vladi, nadležnom ministarstvu i republičkom javnom preduzeću.

Član 5: Propisana je obaveza objavljivanja u "Službenom listu grada Novog Pazara".

Finansijska sredstva za realizaciju odluke:

Finansijska sredstva za realizaciju ove odluke nisu potrebna